

Unnä Äckäla.

Miä hom dähamm a Äckäla ghobt,
Zwölf Beetla wornshalt ner.
Drei mol so long wie braat wors grad.
Füä uns wors doch vill meä.

Es woä deä Taal vo dera Welt
Deä unnä Eichn woä.
Woäs aa net vill, net um vill Geld
'S uns feil gewesen weä!

Des ganza Joä hom miä do ghobt
Zä tunn, zä wegl'n aa
Gänu wie so a Bauä hot
Mit hunnat Tochwerk da.

Zeä Beetla worn do Örpfl drauf
Die homm füä uns gelangt.
Zwaä Bettla Kraut und Wirsching nuch.
Miä hom aa drum gebangt.

Woän donn die Örpfl neigelecht
So Mitte, Ends April,
Do homm miä alla Toch nochgschaut
Wie alls aufgeh will.

Und woän sie do, do homm miä donn
Gebrocht, gejät und gkackt,
Und ghäuftlt senn die Örpfl worn
Wies hat dä Bauä macht.

Und woä donn erscht deä Erntetoch
Dos woä des reinsta Fest!
Die Gäul on unnän kleen Wong
Die senn miä selbä gwest!

In ellä Früh senn miä scho naus
Mit Hachn, Körb und Seck.
Do homm miä donn die Örpfl raus
So oo dreihunnert Stöck.

Um Elfe is die Murrä kumma
Hot Mittoch uns gäbrocht.
Wie hot des gschmeckt bei Luft und Sunna!
Und sie hot froh gelacht.

Kartoffel-Feuä homm mä gschürt
Und senn donn durchgerennt
Wie oft is uns donn des passiert:
Homm Hoä und Schuh verbrennt!

Die Örpfl senn gebrotn worn
In der veraschtn Glut
Und woän sie aa net ganz weich
Sie woän halt trotzdem gut.

Om Omd senn miä donn haamwärts gfoän
Mit schweäbelodna Wong.
Und woän miä aa hundsmäzich müd
Geknurrt hot unnä Mong.

A Knackwurscht hot ea jedä kricht
Däzu noch an Keil Brot
Und Molzkeffee an Hofn voll
Wie hot des gschmeckt! Oh Gott!

Zän Schluß hot unnä Murrä gsocht
Etzt stellt euch heä und bet!
Dankt unnän Herrn, miä hettns net
Wenn ers net geb uns hett!